

შინაური საქმეებზე.

შოველ-კვირული გაზეთი

№ 7.

ფასი ერთი შაური

ფლიური ფასი 4 მან.

წელიწადი მეხუთე.

კვირა, 26 თებერვალი 1912 წელი.

შინაური: 1) ქართველ სამღვდლოების საყურადღებოდ—ეზისკ. დავითისა; 2) ორი სურათი ყოვლადსამღვდლო გაბრიელის ცხოვრებიდან (ლეკსი)—ილ. ფერაძისა; 3) სიტყვა ღვთაებრივის დასაფლავებაზე—დეკ. კ. ცინცაძისა; 4) დიდი რამ არის ვინც იცის წაკითხვა წასაკითხისა—დეკ. ი. წერეთლისა; 5) სამღვდლოების ცხოვრებიდან—სოფლის მღვდელისა; 6) ღვთიური მებაღე—მღვ. იოანე ლუკიანოვისა; 7) კვირიდან-კვირამდე.

მიიღება ხელის მოწერა

1912 წლისათვის

(შოველ-კვირულ გაზეთ)

შინაურ საქმეებზე.

კაზაკოვის ქუჩა, № 17.

გაზეთის ფასი:

წლიურად — 4 მანეთი უველზენ || სამი თვით — 1 მანეთი.
ნახევარი წლით 2 მანეთი. || ერთი თვით — 2 აბაზი.

ცალკე ნომერი ქუთაისში ერთი შაური.

ფულის შემოტანა წლიურ ხელის მომწერთათვის შეიძლება ასე განაწილდეს: თავიდან 2 მანეთი და 1 იენის 2 მანეთი.

განცხადების ფასი წინა გვერდზე პეტიტით სტრიქონი ორი შაური, უკანასკნელზე 7 კ.

ქართველ სამღვდლოების საეურზღებოდ
კოლადმსახურებას დაწესა და ამისა აღდგენას
საჭიროება

მამანო! გთხოვთ პატივი მცეთ და ეს ჩემი
თქვენდამი მიმართვა თავიდან ბოლომდე წაიკი-
თხოთ და საქმეს ჩაუკვირდეთ.

ჩვენ, ქართველები, ღვთის-მსახურებით
თავს ვერ მოვიწონებთ; ეკლესიაში იშვიათად და-
ვიარებით, ხშირ და ხანგრძლივ ლოცვით თავს
არ ვიწუხებთ, ტაძრების განშენებაზე არ ვზრუ-
ნავთ, სასულიერო პირთა ჯეროვანი პატი-
ვისცემა არა გვაქვს და საზოგადოდ საეკლესიო
საქმეებში გულ-გრილობასა და მკონარებას ვი-
ჩენთ. ამ სამწუხარო მოვლენის დამნახველს უნე-
ბლივთ დაებადება აზრი, ვითომც ჩვენ სუსტ
სარწმუნოებისანი ვიყენეთ, არ გვქონდეს ცხო-
ველი სიყვარული ღვთისადმი; და მართლაც რო
ასე ფიქრობენ ჩვენზე უცხოელები. ჩვენი ერი,
როცა მას მარჯვე დრო ჰქონდა, ცოტად თუ
მოსვენებული იყო მტრებისაგან, მხურვალე მო-
როწმუნე იყო; აგებდა იგი მრავალ, დიდ და
მშვენიერ ტაძრებსა და მონასტრებს, არამც თუ
თვის სამშობლო ქვეყანაში, არამედ სხვა ქვე-
ყნებშიაც კი, პალესტინაში, სინაის და ათონის
მთებზე, და, რაც უფრო გასაოცარია, აშენე-
ბდა ეკლესიებს და საეანეებს ისეთ მიუვალ ად-
გილებზე, სადაც ახლა ჩვენ არამც თუ რამე
შენობის აგება, არამედ ერთხელ ასვლაც კი
გვიძნელდება; ის თვის ადგილ-მამულის ეკლესი-
ებსა და მონასტრებს უხვად სწირავდა. მეთო-
თხმეტე საუკუნიდან დაწყებული მდგომარეობა
ქართველებისა შეიცვალა; მონგოლები, თათ-
რები, ლეკები, ოსები, თურქები, სპარსელები
და სხვანი ცეცხლითა და მახვილით იკლებდენ
და ანადგურებდენ მათ, განსაკუთრებით უკანა-
სკნელები. თავზარდაცემულები თითქმის მუდამ
გახიზნული იყვნენ. ყოველთვის მტრის თავზე
დაახმის ლოდინში იყვნენ, მუდამ იმას ფიქრო-
ბდენ, თუ როგორ შეგებებოდნენ მტრებს, გა-
ნედევნათ იგინი და დაეცვათ თვისი ეროვნება
და სარწმუნოება. ცხადია, რომ ვამუდმებულ

ომში მყოფ ქართველებს არც დრო და არც სა-
შვალეობა არ ჰქონდათ ეზრუნათ თვისი ცხოვ-
რების რელიგიურ მხარის განვითარებაზე, რო-
გორც საზოგადოდ თვის ყოფაცხოვრების გაუ-
მჯობესობაზე. ეკლესიები ანუ მთლად დაქვე-
ული, ანუ გაძარცულ-დაცალიერებული იყო.
წირვა-ლოცვა შიდ იშვიათად სრულდებოდა;
ამიტომ ხალხი იძულებული იყო დაკმაყოფი-
ლებულიყო იშვიათ ღვთის-მსახურებითა, წირვა-
ლოცვის ხანდისხან მოსმენითა, და იგი თვის
რელიგიურ გრძნობებს გულშივე იმარხვიდა. ასე
ხდებოდა რაოდენიმე საუკუნის განმავლობაში,
და ბოლოს დროს ეს მოვლენა ჩვენ ერს შეე-
სისხლხორცა, ჩვეულებად გადაექცა, და ეს
ჩვეულება დავიმკვიდრეთ ჩვენ მამა-პაპათაგან.
ახლა, როცა ჩვენ მყუდრო ცხოვრება გვაქვს,
მტრებისგან თავისუფალი ვართ, დრო არის
ვიფიქროთ რელიგიურ განვითარებაზე, ჩვენ უნ-
და დავეჩვიოთ გონებისა და გულის ხშირად
აღპყრობასა ღვთისადმი ლოცვაში, თვის სუ-
ლის კეთილ განწყობილებათა ცხადყოფასა გა-
რეგან ნიშნებითა და მოქმედებითა, რადგან
ესეთ გარეგან გამოხატვას ადამიანის ცხოვრე-
ბაში დიდი მნიშვნელობა აქვს, ის აცხოვე-
ლებს და აძლიერებს სულიერ მდგომარეობათა,
და კიდევ მას კეთილი ზეგავლენა აქვს გარ-
შემო მყოფ პირებზე, აქებებს მათ ღვთის მსა-
ხურებისადმი. ამ საქმეზე ჩვენ განათლებულ
მოძღვრებს თავდაპირველათვე უნდა ეზრუნათ,
მათ უნდა შეეგნოთ, თუ რა დიდი მნიშვნე-
ლობა აქვს სარწმუნოებრივ ცხოვრებაში რე-
ლიგიის გარეგან მხარესა, ხშირ წირვა-ლოც-
ვის მოსმენას, მონასტრებში სიარულს, პარა-
კლისისა და პანაშეიდის გადახდას, სასწაულთ
მოქმედ ხატების ხალხში მიღებას და სხვათა და
სხვათა, რომ ყველა ამებით სარწმუნოება უფ-
რო ცხოველდება, ზნეობა ფაქიზდება, გონება
და გული ადამიანისა უფრო ძლიერად იწყებს
აღმაფრენას ღვთისადმი. მაგრამ საუბედუროდ
ისინი, ანუ შეპყრობილ არიან მკონარების სე-
ნითა, ანუ ვატაცებულ არიან დამახინჯებულ
ლიბერალური აზრებითა და გაიძახიან, რა სა-
ჭიროა ხშირად ხელის ქნევა, მუხლის მოყრა;

ცხოვნება გარეგნობაში კი არ არის, არამედ სულის სიწმიდეში, კეთილ-ზნეობაში, ღმერთი შინაგან განწყობილებათა უყურებს და არა გარეგან მოქმედებებს, ის თხოულობს, რომ ჩვენ მას ვემსახურებოდეთ სულითა და ქეშმარიტებით. ასე მეტყველობენ ჩვენი მოძღვრები და იმას კი არ ამჩნევენ, რომ ხალხი ხელიდან ეცლებათ. კვირა-უქმე დღეს ჩვენი ხალხი ეკლესიაში ყოფნას სახლში და დუქნებში ლაზღანდარობას ამჯობინებს, იმერეთში კიდევ ნახავთ ორიოდ კაცს ეკლესიაში, ქართლ-კახეთში კი... ჩვენ ინტელიგენციაზედ ხომ ლაპარაკი არ არის საჭირო, სწავლა-განათლება და ეკლესიაში სიარული ამა როგორ შეეთანხმება ერთმანერთს. ეკლესია რომ იქცეოდეს, ყურადღებასაც არავინ მიაქცევს; საეკლესიო ნივთები რომ ღებოდეს ყურსაც არავინ გაანძრევს. ჩვენი ერის დაუდევრობა რელიგიურ ცხოვრებაში იქამდის მიდის, რომ მართლაც ეჭვი შეგივათ მის ქრისტიანობაზე. ჩვენი მოძღვრები არ უნდა იფიქვებდნენ იმას, რომ ჩვენი ხალხი ახლა საფრთხილო მდგომარეობაშია; ის იღვიძებს გონებრივ ძილისაგან და ხარბად ეწაფება ყოველივე ახალს, რაც კი შემოდის ჩვენში განათლებულ ქვეყნებიდან; ხოლო ყველამ იცის, რომ უფრო ადვილად და სისწრაფით ვრცელდება ხალხში სარწმუნოების და ქრისტიანობის წინააღმდეგი თეორიები. ამას გარდა უნდა გვახსოვდეს, რომ ჩვენი ხალხი მოყვარულია კრიტიკოსობისა და ადვილად შეიძლება, რომ იგი კრიტიკულად მოეპყრას ეკლესიასა და სარწმუნოებას. ამიტომ თუ ჩვენმა მოძღვრებმა ეკლესია და მისი წესები ხალხს დროითვე არ შეაყვარეს, მაშინ ის ანტირელიგიურ და ანტიქრისტიანულ მოძღვრებათა ზეგავლენით სარწმუნოებაზე და ეკლესიაზე ხელს აიღებს. ამ გვარად კეთილგონიერება მოითხოვს ჩაკვირებას ჩვენი ერის რელიგიურ მდგომარეობაში, გამორკვევას, თუ რა საშუალებით შეიძლება ღეთის-მსახურების აღდგენა, თუ რა ღონისძიებით შესაძლოა ხალხის მიზიდვა ეკლესიისადმი. დავასახელოთ ზოგიერთი საშუალებები.

1) მწყემსის მიერ გულ-მხურვალედ აღ-

სრულება თვის მაღალ სამსახურისა, მისი კეთილზნეობა და მართებული ყოფა-ქცევა. თუ მოძღვარი მთელის თვის არსებით დაკავშირებულია ღმერთთან, აღზნებული კეთილ-შობილ მისწრაფებითა, უყვარს ეკლესია, წირვა-ლცვა და ყოველივე ეკლესიური, დაახლოებულია ხალხთან, მის საჭიროებას თვის საჭიროებათ სთვლის, მეცადინობს მის წინ მსვლელობაზე, მისი მონაწილეა ღირსა და ღმერთში, შეძლები-სადაგვარად ეწევა მას ნივთიერად, — მაშინ ის მიიზიდავს ხალხს თვისადმი და თანაც შეაყვარებს მას ეკლესიას, დაჩვევს მას შინაგან რელიგიურ მდგომარეობათა შესაფერ გარეგან მოქმედებებით გამოხატვასა. ასეთი ღირსეული მწყემსები რომ გამრავლდნენ ხალხში, საჭიროა, რომ იმ დაწესებულებაში, რომელიც მღვდლობის კანდიდატებს უშვებს, საქმე ისე იყოს დაყენებული, რომ მისგან მართლა და კეთილი მწყემსები გამოდიოდნენ. სამღვდლო სკოლის მოსწავლეებს უსათუოდ გათვალისწინებული უნდა ჰქონდეს თვისი დანიშნულება, მათ თვალ წინ უნდა ედგასთ მომავალი სამსახური — მღვდლობისა და ამ საგანს უნდა მიმართონ თვისი აზრები, გრძნობები, სურვილები და თვისი ძალნი; ისინი უნდა ცდილობდნენ საკმაოდ მოემზადნენ ამ ასპარეზისათვის, შეითვისონ ის ცოდნა, რომელიც მწყემსობის თანამდებობას პირდაპირ შეეხება, შეიძინონ ის ცოდნა, რომელიც მათ ხელს შეუწყობს და გაუადვილებს სამსახურს. მათ უნდა აღაღორძინონ თვის სულში სარწმუნოება, აღაგზნონ სიყვარული ღეთისა და მოყვებისადმი, განაფაქიზონ თვისი ხასიათი, განაკეთილ-შობილონ თვისი ყოფა-ქცევა; მათ უნდა შეიყვარონ ეკლესია და მისი წესები. ასეთი მიმართულება უნდა იქნეს სასულიერო სასწავლებელში. არა სასულიერო, არა ეკლესიური მიმართულება მოწაფეებში უნდა იქნეს დევნილი. ყმაწვილები, გატაცებულნი სარწმუნოების და ქრისტიანობის საწინააღმდეგო აზრებითა, თუ მათზე არავითარი შეგონება, რჩევა-დარიგება არ გადის, უნდა განიძეონ სასწავლებლიდან. ასეთი მოქცევა არ იქნება სასტიკი და უსამართლო. განა უსამართლოება იქნება, რომ შავ. საბაღო-

სწო შკოლაში მოსწავლე წუნობდეს იმ პრაქტიკულ საგნებს, რომლებსაც მას ასწავლიან, არ თვლიდეს მას საჭიროდ, არ სწავლობდეს მათ, და ეს ვაჟბატონი გამოაბრძანონ? სწორეთ ესევე უნდა ითქვას სასულიერო სასწავლებლის შეგირდებზედაც, არა სასულიერო მიმართულებისაზე. სამღვდლო სასწავლებელი სპეციალური დაწესებულებაა, მას მიზნად აქვს აღზარდოს მღვდლობის კანდიდატები, და ამიტომ შიგ მართლად სამღვდლო ადამიანები უნდა სწავლობდენ. ვისაც მღვდლობა არ სურს, ეკლესია და ყოველივე ეკლესიური ეჯავრება, და შფოთავს, არ ურჩევნია მოშორდეს იმ ადგილს, რომელიც მას გულს უხუთავს და აშმაგებს, და მონახოს ისეთი ადგილი, ხადაც იგი სულით მოისვენებს და განიხარებს? აქ უნდა შევნიშნოთ კიდევ ისა, რომ მოსწავლეებში ეკლესიურ მიმართულების გამტკიცებისათვის საჭიროა აღმზრდელები მოწაფეებს მამა-შვილურად ექცეოდენ, აწოდებდენ მათ ყოველივე იმას, რაც მათ ეკლესიისადმი სიყვარულს განუცხოველებს, და არიდებდენ მას, რაც მათ განარისხებს და სარწმუნოებასა და ეკლესიაზე გულს შეუცვლის. აი ამისთანა სამღვდლო შკოლა უნდა დაარსდეს. ახლანდელი სემინარია ხომ მართლა სასულიერო სემინარია არაა და იმისგან სამღვდლო კანდიდატები არ გამოდიან. ამ ებარქიაში ორი სასულიერო სასწავლებელი კმარა, და ერთი, სახელდობრ თფილისისა, სამღვდლო შკოლად გადაეკეთათ ან და ფერისცვალების მონასტრის ნაცვლათ სამღვდლო შკოლა დაეაარსათ, მონასტრები ხომ ისედაც ბევრია და ამას გარდა იგი მართლა არ მონასტრობს*).

ეპისკოპოსი დავითი.

(შემდეგი იქნება.)

*) ეს წერილი წიგნაკათ გამოუცია მის მეუფებას და ჩვენ შემთხვევით ჩავივიარდა ხელში. ვბეჭდავთ, რადგან დარწმუნებული ვართ, რომ ეს წიგნაკი ჩვენი მკითხველების უმეტესობას არ მოუწევდა.

რედ.

ორი სურათი ყოვლადსამღვდლო ცაბრიელის (სწავრებიდამ*).

(ვეძღვნი ყოვლადსამღვდლო გიორგის, იმერეთის ეპისკოპოსს.)

I.

უბრალოდ მორთულ სუფთა ოთახში ჰკიდია ხატი ქრისტე მაცხოვრის; იმის წინ ბეუტავს ზეთის კანდელი, გამომკემელი მკრთალი სინათლის. ნათელი ესე სუსტი ცახცახით ოთახის კედლებს ეთამაშება და ხატისა წინ დაჩოქილს მოხუცს სპეტაკ სახეზე დაეფინება. ოხრავს მოხუცი, კვნესის და გმინავს; ღრმად არის მისი გულის ნალველი, მაცხოვრისაკენ აღიპყრობს ხელებს თვალთაგან ცხარე ცრემლისა მღვრელი. მთლად გათეთრებულ იმის გრძელ წვერსა ზედ ეპყურება მისი ცრემლები, და მწარე ნალვლით შეზავებული ისმის შემდეგი მისი სიტყვები: „ოცდახუთ წელსა ვემსახურები, ძეო ღვთისაო, იმერთა სამწყსოს, იმის ზნეობითს განვითარებას ვწირავ ყოველ წუთს და ყოველსა დროს. მიყვარს ეს სამწყსო შენის სისხლითა განბანილი და გამოსყიდული, პირველწოდებულ ანდრიას მიერ შენივე (წავლით განშუქებული; აქვე ვიხილე წუთის სოფელი, და მისივე ვარ მე ღვიძლი შვილი; ჩემსა საკუთარს ვარმად მიმაჩნის მისი კირი და გულის ტყვილი. ურწმუნოება-უსასოებას მუდამ ვსდევნიდი თავ-გაწირული;

*) ამ ლექსის შინაარსი ეკუთვნის იმ დროს, როდესაც 24—25 წლის წინ ყოვლადსამღვდლო ცაბრიელი აპირობდა რუსეთში გადასვლას, თავმოებრებული ათასგვარ დაბეზლებით და ცილისწამებით უღრო კითვის თანამყამულეთაგან.

ი. ფ.

მსურდა მენახა იმერთა მხარე,
 სწავლა-ცოდნითა დაშვენებული.
 არ მეშინოდა ცილისწამების,
 არცა სხვადასხვა მაბეზღარისა;
 ყოველსა მტერსა პასუხს ვაძლევდი,
 რადგან მფარვიდა მე ძალი ღვთისა...
 ენატრობდი სიკვდილის ჩემს სამშობლოში,
 იმის წიაღში განსვენებასა,
 და ქართველ ძველი მოღვაწეების
 საფლავთა შორის „დამკვიდრებასა“.
 და მაშინ, ოდეს ჩემსა სიბერეს
 განუმზადებდი მყუდროობასა
 და მოველოდი ჩემის ნაშრომის
 სამართლიანსა დაფასებასა,
 მტრის შურმან დამცა... ცილისწამებით
 მუქარით, ლანძღვით გამიტყდა გული.
 ვატყობ მყობადში ველარ იგემებს
 სიტკბოებასა აქ ჩემი სული.
 ვერვის დავსწყევლი... მხოლოდ დავსტოვებ
 საყვარელს სამწყსოს ცრემლისა მღვრელი;
 მის განშორებით მოხუცს უდროვოდ
 დამიდნობს გულსა მწვავე ნაღველი.
 დაღონებული მისი ვერხედვით
 საუცხოვოში გარდავიცვლები
 და ჩრდილოეთის ცივი ცის ქვეშე
 შავ ბნელ სამარეს მივებარები.
 სიკვდილის წინაც ჩემი სამშობლო
 ჩემისა ლოცვის საგნად იქნება;
 მის სიყვარული, იმისი ტრფობა
 მე იქ საფლავშიც კი თან ჩამყვება!...“
 ასე იტყოდა მოხუცებული
 მღვდელმთავარი და თან ქვითინებდა;
 ჰაეროვნებით ძველისა აღთქმის
 წინასწარმეტყველს მოგვაგონებდა.
 გამწყრალი თვისთა შეილთა ურჩობით
 ამავე შეილებს ღმერთს ავედრებდა...
 თანაც ყოყმობდა... საყვარელ სამწყსოს
 დასატოვებლად ვერ იმეტებდა.
 აკვირდება ის ჯვარცმულ მაცხოვარს,
 ეკლის გვირგვინს ქვეშ თითქოს მღიმარეს,
 აკვირდება და რაღაც ახსენ
 ძალი ეძლევის მოხუც მღვდელმთავარს.
 ეს ძალი იმას უმხნეებს გულსა,

მისსა სიმხნესა აღაფრთოვანებს..
 ნუ თუ დასტოვებს მართლა სამშობლოს
 და სამწყსოს თვისას მით დააობლებს?!

II.

„რად გავიფიქრე ჩრდილოეთს წასვლა,
 სად დამეკარგა მტკიცე მხნეობა,
 რისთვის შემიპყრო უსასოებამ
 და ჩამესახა სულმოკლეობა?!...
 ვერ მივატოვებ საყვარელს სამწყსოს, —
 აღარ მსურს აღარ, წავიდე სხვაგან,
 გინდა დამკუწონ აქ ლუკმა-ლუკმად
 და გინდა ჯვარზე ცმულ ვიქმნე მტრისგან...
 ტურფა გელათო! შენა ხარ ძარღვი
 ქართველი ერის წარსულ დიდების,
 კერა ხარ მათი ეროვნებისა
 და წინდი მისის აღორძინების...
 ყოველსა ქართველს შენი მოლოცვა
 ერთგვის მაინცა ენატრებოდა;
 და სხივი შენის განათლებისა
 მთელ საქართველოს ეფარებოდა...
 ორი მზე ქართველთ ბედნიერების:
 დავითი დიდი და „თამარ წყნარი“
 მუდამ გეტრფოდენ და შენს წიაღშიც
 ნახეს სამუდამო თავშესაფარი.
 დილო გელათო წმინდა სავანე
 უკვდავი დავით აღმაშენებლის,
 შენ შემივედრე, როს აღვსრულდები.
 მაღიდებელი შენის სახელის!
 შენსა წიაღში, დავითის გვერდით,
 მეც მიწყალობე ერთი სამარე;
 იქ ჩამიხუტე შეილივით გულში
 და შენი მიწაც გადამაყარე!“
 ასე იტყოდა იმავ ხატის წინ
 კოტა ხნის შემდეგ მოხუცებული
 და ეტყობოდა, თავგანწირვისა
 ღრმა გრძნობით იყო ის გამკვალული....

ილ. ფერაძე.



სიბჱვა,

თქმული 1912 წლის იანვრის 3 ქვაშვე-
თის წმიდის გიორგის ეკლესიაში ნ. ბ.
ლოლაბერიძის ანდერძის აგების წინ.

კაცად-კაცადი იქმოდენ კეთილსა თავისითა
ხელითა, რათა აქუნდეს მიცემად ვის იგი უხმდეს
(1 ფეს. 4, 28),

მიუწერს წმიდა მოციქული პავლე ქრის-
ტიანეთა და მით გვასწავებს, რომ პატიოსანი
შრომით მოპოებული ქონება ქრისტეს მორწ-
მუნემ უნდა არა თუ მოიხმაროს დასაკმაყო-
ფილებლათ თვისთა მოთხოვნილებათა, არამედ
გაუნაწილოს კიდევ მათ, ვის იგი უხმდეს, ე.
ი. ვინც მოკლებულია საშუალებას, მოიპოვოს
პური არსობისა საკუთარის შრომითა. ეს სწავ-
ლა მოციქულთა დროინდელ ადამიანთათვის
ახალი და თითქოს გაუგებარიც იყო, ვინათგან
წარმართობას ქველმოქმედება არა სწამდა და
დაჩაგრულთა ბედ-იღბალი ნაკლებად აწუხებდა.
ლარიბ-ლატაკის შეხვედრა ცულ ნიშნად იყო
მიჩნეული და სიბრალულის ნაცვლად გამოიწ-
ვევდა ხოლმე ზიზღსა და შიშის ზარსა. ამ
კრუმორწმუნოებას და გულქვაობას განათლე-
ბული საზოგადოების წარმომადგენელნი თავისე-
ბურად ასაბუთებდნენ კიდევ: რასაცა გაიღებ
გლახაქისთვის, იმას აკლებ შენს თავსა, ხოლო
მიმღებს ხელს უწყობ განაგრძოს თავისი ტან-
ჯული სიცოცხლე, რომელიც, რაც ადრე შე-
სწყდებო, მით უკეთესიაო.

ეს სიბნელით მოცული მსოფლიო მხე-
დველობა ქრისტიანობამ უარ-ყო, აღიარა რა
ადამიანის მკვდრებით აღდგომა და საიქიო ცხო-
ვრებისათვის ამ ქვეყნადვე საშხადისის საჭირო-
ება. ამ სწავლით აქაურ სიცოცხლეს განსახ-
ლერული ღირებულება მიეცა, რათ განაც საი-
ქიოსათვის მოშხადება ადამიანს შეუძლიან მხო-
ლოდ მაშინ, როცა სააქაოს მის სიცოცხლეს
და საიქიოსათვის საშხადისის ძლიერი რამ და-
მაბრკოლებელი მიზეზი არ გადაეღობება. ამ
გვარ მიზეზად ხორც-შესხმულის არსებისათვის
უპირველეს ყოვლისა უნდა ჩაითვალოს სიღ-

გურის, სამოსლის და სულისა და ხორცის სა-
ზრდოს უქონლობა,

მკვდრებით აღდგომის მქადაგებელთა
მკისვე ათხოვეს ყური ამ გარემოებას და გარ-
კვევით აუხსნეს წარმართთა და ურიათაგან მო-
ქრისტიანებულთ თუ როგორ უნდა მოპყრო-
ბოდნენ ნივთიერად დაქვეითებულთ თანამორ-
წმუნეთ: ჰხსნილ-ჰყავ ხელი შენი ძმისა მის შე-
ნისა ნაკლულევანისათვის (მეორე სჯულთა
15, 11); ნუ ვიყვარებით სიტყვითა ხოლო,
გინდენითა, არამედ საქმითა და ქეშმარი-
ტებითა (1 იოან. 3, 17); სახმართა წმიდათსა
ეზიარებოდეთ (რომ. 12, 13); ურთიერთს
სიმძიმე იტვირთეთ (გალატ. 6, 2), მოწყალებას
გაიღებდეთ, ნუ მწუხარებით, ნუცა უნებლებით
(2 კორ. 9, 7), არამედ მზიარულებით (რომ.
12, 8). ამ მოციქულთა დარიგებამ გამოიღო
ჯეროვანი ნაყოფი: ქრისტიანებმა იწყეს შეგ-
როვება თავიანთის წვლილისა და დადებამისი
ფერხთა თანა მოციქულთასა ნაკლულევანთა
საჭიროების აღსავსებელთ.

მოციქულთა შემდეგ, რაც მეტი დრო გა-
დიოდა, მით უფრო ფართოვდებოდა და ვითა-
რდებოდა მათ მიერ დაწყებული და ნაკურთხი
წმიდა საქმე: მორწმუნეთა საზოგადოებამ მალე
შეიგნო ურთიერთს სიმძიმის ზიდვის და სიყვა-
რულის ძლიერება და მხნედ შეუდგა შეუძლებელ
წვერთა ხორციელთა თუ სულიერთა საჭირო-
ებათა დაკმაყოფილებას. საზოგადო საქმეში
მონაწილეობის მიღებას ყველა ცდილობდა და
იძლეოდა, რის მიცემაც შეეძლო: ზოგი ცოდნას
და შრომას, ზოგი კი ნივთიერ საშუალებას. მოქ-
მედების ასპარეზს წარმოადგენდნენ ეკლესიები
და მონასტრები, რომელთა კედელთა შორის
თავს იყრიდნენ საუკეთესო მამულისშვილნი.

გაციდნენ დრონი და მონასტერ-ეკლესიებმა
დრჰკარგეს დაუშრეტელი წყარო ცხოვრებისა, —
მორწმუნეთა მიერ შეწირული მამულები და
ამის გამო იძულებულნი გახდნენ ნაკლულევა-
ნთა საჭიროებათა დაკმაყოფილებისათვის ზრუ-
ნვა დაეთმოთ ქედელთა გარეშე მყოფთა ქრი-
სტიანეთათვის, რომელთაც იმავე სიყვარულით
განმსქვეალულთ შეადგინეს სხვა და სხვა სა-

ქველმოქმედო და განმანათლებელნი საზოგადოებანი. ასე იყო ხსეგან და ასევე მოხდა ჩვენ-შიაც.

წინაშე ჩვენსა მდებარე ცხელარი ნიკოლოზ ლოლნერიძისა მოწამეა მისი, თუ საუკეთესო შვილნი ჩვენის ქვეყნისა რაოდენად გრძობდნენ საქიროებას ჩვენის ერის ქონებრივად და გონებრივად დაქვეითებულის ნაწილისათვის ზრუნვისას და რა ღონისძიებას ხმარობდნენ ამ საქიროების დაკმაყოფილებასათვის. განსვენებული ნიკოლოზი ერთი იმ მცირე რიცხოვან პირთაგანია, რომელთაც ქართულის დრო გამოშვებითის გამოცემის საქმე მტკიცე ნიადაგზედ დააყენეს და დააარსეს ქართველთა შორის წერა-კითხვის გამავრცელებელი საზოგადოება და მით ცოტაჲ თუ ბევრაჲ შეუმსუბუქეს შობილის ერის შვილებს სწავლის და ცოდნის შეძენა. იგი, როგორც ქეშმარიტი ქრისტეანე, მთელს თავისს ხანგრძლივს სიცოცხლეში იქმნადა კეთილსა თვისითა ხელითა, რათა აქუნდეს მიცემად, ვის იგი უხმედეს, და დასასრული ამა ქვეყნად მოღვაწეობისა დააგვირგინა თავის ქონების დიდის ნაწილის შეწირვით განმანათლებელ საზოგადოებათათვის. ეს უხვი შეწირულება, რამდენათაც თვალსაჩინოდ ჰყოფს განსვენებულის ნიკოლოზის სულის ქრისტეანულ განწყობილებას და ზნეობრივ სიფაქიზეს, იმდენადვე ავალებს ჩვენს განმანათლებელ საზოგადოებას მხნედ მოღვაწეობას.

ამისათვის, შევსთხოვით, საყვარელნო, უფალს, რომ მან, თანახმად მისის მცნებისა, მოძმეთათვის მოწყალე სული მონისა მისისა ნიკოლოზისა შეიწყალოს და სიტკბოებით განასვენოს, ხოლო ჩვენს განმანათლებელ საზოგადოებათა მაჰსცეს ძალი და სიმხნე ნიკოლოზ ლოლნერიძისთანა მამულის შეიღთა მოლოდინის გამართლებისა. ამინ.

დგ. კ. ცინცაძე.

„დიდი რამ არი, ვინც იცის წაკითხვა წასწავითხვისა.“

ილია ქავჭავაძე.

იმერეთის ეპარქიის სამღვდლოების დეპუტატთა უკანასკნელ კრებაზე სხვათა შორის აღიძრა კითხვა იმაზე, რომ ხალხი ეკლესიაზე აღარ დაიარება და რა საშეალება ვიხმაროთ, რომ ხალხი მივიზიდოთ ეკლესიაშიო. ბევრი სხვადასხვა აზრი გამოითქვა ამის შესახებ.

ყველა დასახელებული მიზეზები საპატიო იყო და ყველას ჯეროვანი ყურადღება უნდა მიექცეს, მაგრამ მე მხოლოდ ამ წერილში ერთ საკითხს მივაქცევ ყურადღებას, ვისიც ჯერ არს, და აი რას. საქართველოს ეკლესიაში, რომ დღეს მწიგნობრობა, მგალობლობა, და ტიპიკონის ცოდნა დაკნინებულია, ამას ყოველი ქეშმარიტი საქართველოს მორწმუნე შვილი გრძობს. აიღეთ თუნდა ქალაქის და თუნდ სოფლის ეკლესია. რა გესმისთ აჲ? სრულიად გადაგვარებული კითხვა, გალობა და კილო. მღვდლის და დიაკვნის ხმა სრულიად არ უდგება ერთი მეორეს: ერთი მთისკენ, მეორე ბარისკენო, რომ იტყვიან, ისეა: მათთვის არც კილო სუფევს და არც ხმის შეწყობა. როდესაც მღვდელი საიდუმლოს ლოცულობს, დიაკონი ვაი ვუის გაიძახის უშნოთ და ულაზათოთ, თითქო სიზმარში არისო. რასაკვირველია ყველაზე არ ითქმის ეს, მაგრამ უმრავლესობა მოუშადადებელია და გულგრილათ ეკიდება საქმეს. ტიპიკონს ხომ ყოველი ეკლესიის კრებული თავის სურვილზე ასრულებს და კიდევ რომ უნდოდეს, რიგანათ შესრულება, რომელიმე მღვდელმოქმედებისა, მაინც არ ძალუძს, რადგან მოუშადადებელია. კარგათ მომზადებული ქართულ მგალობელთა გუნდი ხომ არც ქალაქებშია და არც სოფლებში.

დიდი ხანი არ არი, რომ ერთი საპატიო პირი დასაფლავდეს. ორმოცდაათამდე მღვდელი დიესწრო წესის აგებას, დაიწყეს მუხლამუხლათ კითხვა წესის აგებისა და რა აღმოჩნდა! ამოდენა სამღვდლოებაში, ორმა თუ სამმა წი-

იკითხა კურთხევანი ხეირიანათ, დანარჩენი ძლიერ კოკლობდა.

თუმცა მეცხრამეტე საუკუნეში თანდათან დაკნინდა საეკლესიო მწიგნობრობა - მაგლობლობა, მაგრამ მაინც ბევრი იყო სამღვდელთა შორის, რომელთაც ზედმიწევნით იცოდნენ საღმრთო წერილი და მწიგნობრობა - ვალობა. მაგ. ნიკოლოზ არქიმანდრიტი, ნიკიფორე არქიმანდრიტი, იესე დეკანოზი ვიორგაძე, დეკანოზები ქუთათელაძე ნიკოლოზ, ვასილ, დეკანოზი დავით წერეთელი, მღვდელნი სიმონ და ოქროპირ ჩარკვიანები, დევიძე, დავით კაპანაძე და სხვანი. ეს უკანასკნელი ჩემი ამხანაგი იყო და უნდა აღვიარო, რომ მისი მკაფიო ჯავარიანი ხმა, მშვენიერი კილო კითხვა - ვალობისა, საღმრთო წერილის კარგად ცოდნა დღესაც ყურში ჩამძახის და როცა ეკლესიაში შევდივარ ყოველთვის შენდობას უთვლი. დღეს თუმცა სემენარიელები ბევრია სოფლათ თუ ქალაქათ, მაგრამ, ზოგიერთების გამორიცხვით, ყველა მათგანი ზემოთ ჩამოთვლილ ღირსებებს მოკლებულია და ეს მათი ბრალი არ არის, რადგან სასწავლებელში მათ ეს არ უსწავლიათ. სად სწავლობდნენ წინეთ საღმრთო წერილს, მწიგნობრობა-მაგლობლობას? მონასტერში, სადაც უმაღლეს ხარისხამდი იყო ესე ვითარი აყვანილი, მაგრამ დღეს აღარც მონასტერშია რიგიანი მწიგნობრობა და აღარც სოფელში. როგორ შეიძლება, რომ ძველი სახელოვანი მწიგნობრობა-ვალობა და ტიპიკონის ცოდნა აღსდგეს ისევ საქართველოს ეკლესიაში? როგორც ამბობენ ალისუბნის ორკლასიანი შკოლა გელათის მონასტერში გადააქვთ. თუ ეს მართალია, აი ამ შკოლაში უნდა გაიხსნას კურსები საღმრთო წერილის კარგათ კითხვისა, ვალობისა და ტიპიკონისა, სადაც ყოველი სამღვდელი, სადიაკონო და სამედავითნო პირმა, თუნდა სემენარიელიც იყოს ეს, უნდა გაათავოს ეს კურსები. მასწავლებლები ზემოთ ჩამოთვლილი საგნებისა უნდა მიიწვიონ კარგათ მცოდნე ხსენებული საგნებისა და რადენიმე ათეული წლის შემდეგ ყოველივე გასწორდება, საქართველოს ეკლესიაში ვავიგო-

ნებთ მშვენიერ საღმრთო წერილის კითხვა-ვალობას, რაიცა მსმენელებს მოიზიდავს ეკლესიაში. ასე უნდა იქნეს გახსნილი კურსები საღმრთო წერილისა ქართლ-კახეთის ეპარქიაშიაც.

სგათა შორის დღეს ზოგიერთები იმ აზრის არიან, რომ ჩვენი ნასწავლი ვსრდელთა ბული ინტელიგენცია ეკლესიას გაურბისო, მაგრამ მათში კილო მრავალი პირია, რომლებიც დიდი სიამოვნებით მოისმენენ წირვა-ლოცვას, ოღონდაც იყოს რიგიანათ შესრულებული. ამის მაგალითი მრავალია უწინ და ეხლაც. აბა ვინ იყო უწინ ილია ქაჯვაძეზე ღრმად განსწავლული, რომლის სიტყვებითაც ეს ჩემი წერილი დავიწყე, მაგრამ როგორც მისი ნაწერებიდანაც სჩანს ის იყო ღრმად მოწმუნე. დიმიტრი ყიფიანის გახსენებაზე ყოველადსამღვდელი აღექსანდრეს ეწირა, წირვა ქართულად შესრულებია მრავალი სამღვდელოების თან დასწრებით. წირვა მოუსმენია ილია ქაჯვაძეს და მთავარდიაკონის კარგარეთელის სახარების წაკითხვას აღტაცებაში მოუყვანია, რომელსაც „ივერიაში“ ვრცელი წერილი უძღვნა ზემოთმოყვანილი სიტყვებით. რამოდენიმე ხნის შემდეგ აკაკი წერეთელს მოუსმენია წირვა იმავე მთავარდიაკონის თანამწირველობით და იმასაც მოსწონებია მისი ხმა და კილო. აკაკიმაც უძღვნა წერილი, მგონია „ქრებულში“, ამ საგანს. მაგრამ ეს აღარც თავის წერილში კარგარეთელს, განსვენებული იმერეთის ეპისკოპოსის გაბრიელის არქიდიაკონს ჯანელიძეს, თუმცა მოსწონს კარგარეთელი მაგრამ ჯანელიძის არჩილს უწოდებს. მეც მახსოვს ჯანელიძე და მისი ჯავარიანი ხმა და წირვაც მომისმენია, აგრეთვე კარგარეთელისთვისაც მრავალ გზის მიყურებია წირვა, მაგრამ უნდა აღვიარო, რომ თუმცა კარგარეთელს მშლავრი ტკბილი და უხიწო ხმა აქვს, მაგრამ ქართულ წირვაში მას გამოუდის რუსული ხმის ბგერა, რაიცა არ შეშვენის ქართულ წირვა-ლოცვას. სხვა მთავარდიაკონებზე რომ ვიქონიოთ მსჯელობა, მათი ქართულათ წირვა, ხმა და სახარების კილო ძლიერ დაშორებულია ქართულ კი-

ლოს, ჯაგარიან და მკაფიოთ გამომეტყველ ხმას.

უველა ზემოთ ჩამოთვლილი შეიძლება ზოგიერთებს კიდევ ეწყინოსთ, მაგრამ ხომ მოვეხსენებათ, რომ მოყვარეს პირში უძრახე და მტერს ზურგს უკანო. მონდომება, თორემ უოველივე გასწორდება და ილია ქვეყანის სიტყვები ქება-ქებათა იქნება ჩვენი სამღვდლოები სათვის.

დევ. ი. წერეთელი.

სამღვდლოთა ცხოვრებიდან.

ნამუშა კატოა გულქვაობისა.

მართალია, მძრახველს ძრახვათ ვით კი ავად მოუხდების, მაგრამ ფარვა სიავისა ქვეყანას არ მოუხდების!

დ. გურამაშვილი.

საზოგადოების არც ერთ ნაწილში პოეტის ზემოთ მოყვანილი სიტყვები ისე სიცხადით არ მართლდება, როგორც სასულიერო წოდებაში. ღმერთმა დაგიფაროსთ, რომ ამ წოდებაში ვისიმე ნაკლულევანება გემხილებიოსთ. რაც უნდა საფუძვლიანი იყოს მხილება, სრულებით არ მიიკარებს ის, ვისაც შეეხება, და მის მაგიერათ, რომ შეიკდიმოს და გასწორების გზაზე დაადგეს, ერთ ალიაქოთს ასტებს: ესა და ეს კაცი მემტერება და ცდილობს საზოგადოების თვალში ცილის წამებით დამამციროსო. და არა თუ მართო ცუდ საქმეში მხილებული, ხშირათ მთელი მისი მოკეთებები აღშფოთდებიან სრულიად სამართლიანი მხილებისათვის. ამასწინეთ ზემო იმერეთის ერთ „კეთილმოწესეს“ უწესო მოქმედებები უკიყინეს. როგორც სიმართლეს მოკლებულმა, პასუხის გაცემა გაზნეთისავე საშუალებით მართო ვერ შეძლო, რაისათვისაც შეკრიბა მთელი საკეთილმოწესის სამღვდლოება და შეერთებული ძალით შეთხზული წერილით უნდოდა თავის გამართლებას; მაგრამ წარმოიდგინეთ, არც მ. მ.

კეთილმოწესისა და მისი ხელქვეითი მღვდლების შეერთებული ძალით შედგენილი საპასუხო წერილი იქმნა დაბეჭდვის ღირსათ ცნობილი უღმობელი რედაქცისაგან, თუმცა წერილი საბუთად, როგორც ამბობენ, დღესაც ინახება კეთილმოწესის არხივში. რატომ ვერ გრძნობენ მ. მ. კეთილმოწესე და მისი ხელქვეითები, რომ სამართლიანი მხილება მტერობა კი არა, მოყვრობა არის, თუ კი მას მივიღებთ და გასწორების გზაზე დავადგებით? განა ხალხის გენიოსობის ნაყოფი ანდაზაც ამას არ ამტკიცებს, როდესაც გვიჩვენებს, მოყვარეს პირში უზრახეო... ამ მოსაზრებით, გინდა ბევრიც მაგინონ. აქვე უნდა მოვიყვანო ერთი მაგალითი შეუბრალებლობისა, რომელსაც ადგილი არ უნდა ჰქონდეს არც ერთი წოდებაში.

წასული 1911 წლის დეკემბერში ქ. ქუთაისში იყო იმერეთის სამღვდლოების დებუტატთა კრება. ჩემდა საუბედუროთ, შემთხვევით ერთ კრებაზე დავესწარი და კაცთა გულქვაობის ისეთი სურათი ვნახე, რომელმაც გული დამიკოდა და სული აღმიშფოთა. კრების დარბაზში, სადაც ორმოცამდე მღვდელი იქნებოდა, ერთი შავით შემოსილი შუათანა ხნის დედაკაცი შემოვიდა. ეტყობოდა ასეთი კრების ნახვა ამ დედაკაცისაგან პირველი შემთხვევა იყო და ამიტომ ის დარცხვენით ერთ ადგილას აიტუზა. როგორც სამოსელი, ისე მისი ნაღვლიანი ნახევრად დაბურვილი სახე უსიტყვოდაც ცხადყოფდენ, რომ მას დიდი უბედურება უნდა დასტებოდა თავზე, უდიედესი ნუგეში უნდა დაკარგოდა ამ ისედაც სიმწარით სავსე წუთისოფელში. თავჯდომარის კითხვაზე, თუ რისთვის მობრძანებულა, დედაკაცმა მორცხვით, თითქოს პირში ნერწყვი უშრებოაო, მოახსენა კრებას: „მე, თქვენი ჭირივ, სერაფიონ ჩიხლაძის უბედური ცოლი ვარ; არავითარი ცხოვრების სახსარი არ მაქვს და არ ვიცი რით შემოუარო წერილ შეილებს; შეხედეთ ჩემ სისაწყლეს და აღმომიჩინეთ რაიმე შემწეობა!! თავჯდომარემ აღუთქვა თხოვნის განხილვა და უბრძანა გარეთ გასვლა. თავჯდომარემ კრებას წინადადება მისცა საკითხი ფეხზე ადგომით გადაეწყვიტათ, ე. ი.

ვინც შესაძლოა თვლიდა გარდაცვალებული მღვდლის სერაფიმონ ჩიხლაძის ქვრივის თხოვნის შეწყნარებას, ის ფეხზე უნდა ამდგარიყო. ღმერთი შეეწიოსთ, დებუტატების უმეტესობა მყის ფეხზე წამოდგა, მაგრამ ერთი ცნობილი „კეთილმოწყნარებელი“ დეკანოზი, რომელიც მტრედისებური უმანკობა-გულუკეთილობისათვის თავის ერთგული ქვეშემდრომი მღვდლებისაგან რამოდენიმეჯერ არაჩვეულებრივად დაჯილდოებულ იქმნა! არა თუ თითონ არ აბრძანდა, პირიქით, ჯერ მის მახლობლათ მდგომი ხელქვეითი მღვდლები დააჯინა ანაფორაში დაწვეით და მერე ამ უკანასკნელებმა, რაკი თავისი ბრძანების სურვილი გაიგეს, საჩქაროთ აამოძრავეს ხელნი, ბაგენი და თვალნი, რა საშუალებითაც ბლომათ ფეხზე მდგომნი დააჯინეს. ამის ნაყოფი კი ის იყო, რომ დათვლის შემდეგ დამჯდარი მეტი აღმოჩნდა და ქვრივი უნუგეშოთ დარჩა. წარმოიდგინეთ, მკითხველო, რა უნუგეშო შეიქმნებოდა საწყალი ქვრივის ისედაც უნუგეშო მდგომარეობა, როდესაც გაიგებდა, რომ მას ყურადღება არ მიაქცია იმ ადამიანთა კრებამ, რომელთაგან მეტი იმედი და საბუთი ქონდა უბრალებისა. მაგრამ ნურც ასე უნუგეშოთ დავტოვებ ჩვენი თანამის გაქვირებულ კოლშვილს. იმედია მომავალ კრებაზე მ. მ. დებუტატები ისევ გაიხსენებენ ქვრივის ვედრებას და შეძლებისამებრ კიდევ დააკმაყოფილებენ მას. ზენ ყველას უნდა ვაძლევდეთ მაგალითს მოყვანის უბრალებისას ჯერ ქრისტიანულისა და მერე უბრალო ადამიანური გრძნობის მიხედვით. უკანასკნელ შემთხვევაში ის მაინც გვახსოვდეს, რომ არავინ სიკვდილისა და გაჭირვებისაგან დაზღვეული არ ვართ. და, ვინ იცის, ჩვენი კოლშვილიც ხსენებული მღ. კოლშვილის მდგომარეობაში არ ჩავარდება. კარგი იქმნებოდა, რომ ბედკრული საკითხი იმერეთის სამღვდლოებისათვის სამარხი კასის დაარსების შესახებ დროზე სასურველათ დაბოლოებულიყო. მაშინ ხომ ჩიხლაძის ქვრივიც რამოდენიმედ მაინც ნივთიერათ უზრუნველყოფილი იქმნებოდა და არ დასჭირდებოდა ასე უნაყოფოთ ხვეწნა-ვედრება სამღვდლოების წინაშე.

სოფლის მღვდელი.

ღვთიური მებაღე.

(წმ. ფოკა. ხსენება 22 სექტემბერს.)

ქრისტიანების პირველ დროს, როდესაც წარმართები ჯერ კიდევ სდევნიდნენ ქრისტეს მორწმუნეებს, მცირე აზიის ქალაქ სინოპში სცხოვრებდა პატიოსანი მებაღე, სახელად ფოკა. ის იყო კაცი ღარიბი, უბრალო, უსწავლელი და შრომის ცხოვრებას ეწეოდა.

ახალგაზღობაში იმას შეხვდა მემკვიდრეობით ქალაქის მახლობლად, გზის გვერდზე. მიწის ნაჭერი. ადგილი იყო პატარა და მივარდნილი; მიწა—უნაყოფო, ადგილ-ადგილ ქვით სავსე, ზოგჯერ კიდევ—ბუჩქნარი. არც სახნავად და არც საძოვრად იგი არ ვარგოდა. რაღაც უღაბური ადგილი იყო.

ნაცნობები დასცილობდნენ:

— მოგვილოცნია სამკვიდრებელი! ეხლა მებატონე გახდი. ხომ არ აიყვან მოურავს?

ფოკა არ თავილობდა.

— საქმე იმაში კი არ არის, რამოდენი მიწა გვაქვს. არამედ იმაშია, რამოდენა შრომას გაუწევთ მას. მე პატარა კაცი ვარ, დიდი ძალ-ღონე არა მაქვს, — ამიტომ კოტაც მერგო. სახარებაში ნათქვამია: „ერთს მიეცა ხუთი ტალანტი, მეორეს — ერთი, თვითუფლს ძალისაგებ მისისა“. ჩემი ძალისათვის საყოფია ეს პატარა მიწაც; ნეტავი ამას მოუვარო.

და ფოკაც სცდილობდა მოვლას. მიწის შემოსავლით ცხოვრება არ შეიძლებოდა, ამისთვის იმან სხვა საქმეც გაიჩინა; სხვის საქმეებზე მუშაობდა; ხოლო თავისუფალ დროს თავის მიწას ახმარებდა: ასუფთავებდა ქვებიდან, ბუჩქნარებს ჰკაფავდა. შემოდგომობით მიდიოდა ტყეში, აგროვებდა ჩამოცვივულ ფოთლებს; გზაზე ჰკრეფდა პატიეს; ყველა ამას აყრიდა თავის მიწას და ბარავდა.

სამი-ოთხი წლის შემდეგ მიწა გასწორდა, გასუფთავდა, განოყიერდა. ფოკამ ღობე შემოარტყა მას, და შიგ ბაღი გააშენა. მოსტენულობა მოვიდა მართლაც საუკეთესო. მწვანი-

ლულობით გამოკვება შეიძლება მთელ წელიწადს.

ფოკა ეხლა მთლად მიეცა თავის მამულს. დაუწყო გაშენება ნაყოფიერ ხეებს, ხილის ბუჩქებს. კარგად უვლიდა მათ, რწყავდა, ასუფთავებდა ბალახიდან. ხეები გაიზარდნ და მისცეს დიდი მოსავალი. ფოკა რგავდა კიდევ თანდათან ახალ ხეებს, და რამდენიმე ხნის შემდეგ ეს უდაბური ადგილი გადაიქცა საუცხოვო ბაღად.

ბუჩქებსა და ხეებს შუა შრომის მოყვარე ფოკა რგავდა ყვავილებს, და ბალი უნებლიედ იზიდავდა თავისკენ ყველა გამვლელ-გამომვლელს.

ბევრი მგზავრი ჩერდებოდა ლობესთან და შეტრფიალებდა ყვავილებსა და მშვენიერად ჩამწკრივებულ ხილის ხეებს. გულკეთილი ფოკა სალამს აძლევდა ხოლმე ყველას, დიდი სიამოვნებით დაუწყებდა საუბარს, თავაზიანათ შეიწვევდა ბაღში, რომ ახლო დაეთვალეირებიათ ყვავილები, ხან გაუმასპინძლებოდა სიტყვში მშვენიერი ხილით, ხან ყვავილებს აჩუქებდა.

„ეს ჩემი არ არის, ღვთისაა“, — ამბობდა ის. ღმერთი უგზავნის ყოველივე ამას ხალხს სასიხარულოთ და მოსახმარებლათ: საუცხოვო ყვავილებსაც და გემრიელ ხილსაც. დედა-მიწის გულში ღვთისაგან ჩადებულია დიდი ძალები. ისინი მხოლოდ უნდა გაშალო და ნაყოფიერებით აგავსებენ.

— უფრო კიდევ მომეტებული მადლიანი ძალებია ჩანერგული ღვთისაგან ადამიანის გულში, — გადადიოდა ფოკა კაცის ცხოვრებაზე. — დაუფასებელი განძია ჩადებული ყოველი ჩვენგანის გულში. განძი, რომელიც არასოდეს არ ყოფილა და არც იქნება არც ერთ მეფის საუნჯეში,

— ცოტა სარგებელია ამ განძისგან, — ეუბნებოდნენ ფოკას. — როგორღაც ვერა სწვდება ხალხი ამ განძს. სჩანს, ძრიელ ღრმითაა შენახული. უთუოდ შეხება არ შეიძლება იმისი.

— შეხება ბარემ შეიძლება, მაგრამ ჩვენ არ გვინდა შევეხოთ, — დარიგების კილოთი განაგრძობდა ფოკა. — ჩვენ სულ იმასა ვცდილობთ მივიღოთ რამე, და არა გავიღოთ. ვფი-

ქრობთ, ცხოვრება რითიმე გარეგანათ გავამშვენიეროთ, და არა ჩვენი სულის სიკეთით და სიმართლით. აღმასებს და ბრილიანტებს რა ხელოვნურად ესჩარხავთ, მთელი ქარხნები არსებობენ ქვების სათლელი, ხოლო ჩვენი სულის მარგალიტებს კი ტალახში ისე ვტოვებთ. უბრალო გაწმენდაც კი არ გვინდა მათი, არამც თუ გაჩარხვა.

მსმენელები უკვირდებოდნენ ასეთ ლაპარაკს. ისიც მოხდებოდა ხოლმე, რომ ზოგიერთი მოდიოდა ბაღში არა ყვავილების და ხილისათვის, არამედ ფოკას სიტყვების მოსასმენელათ.

შესჩიოდნენ, ცხოვრება გაძნელდა და სული გვეხუთებაო.

— თქვენ, ჩემო მეგობრებო, ნუ ფართოდებით! — აღერსიანად ამშვიდებდა თავის სტუმრებს ფოკა. — თუ ვიწროობაა ცხოვრებაში, მაშ თქვენ უნდა მოქუჩდეთ. ამის ნაცვლად კი ჩვენ სულ ვფართოდებით. სულ იმასა ვცდილობთ მეტი მიწა შევიძინოთ. სხვებს ვუჩივით; ვთხოვლობთ, რომ იმათ დაგვიტომონ, ჩვენ კი უფრო იქით მივიწვევთ. ამნაირათ, ყველანი ვფართოდებით, ერთმანეთს ვავიწროვებთ, ამიტომაც ვიწროობა და ძნელი ცხოვრება. სივიწროვეა ხალხისათვის, იმიტომ, რომ ადამიანის სულში ადგილი აღარ არის ღვთისათვის. ბევრი რამეებით არის ამოვსებული კაცის სული. ეტყვი კაცს:

— ღმერთი უნდა გახსოვდეს, უნდა ლოცულობდე.

გიპასუხებენ:

— სადღა მცალიან ლოცვისთვის? არა მცალიან. მუშაობაში და დავიდარაბაში ყველამდინ ვარ ჩაფლული. ვიღას ცხელა ლოცვისათვის?!

და ამნაირათ: რაიმე მანქანების გაკეთებისათვის, ტყუილის მოგონებისათვის, მთელი საათობით ლანძღვა-გინებისათვის, — ყველა ამავბისთვის არის ღრო; ხოლო ლოცვისათვის, ღვთის მოგონებისათვის, თავის ცხოვრებაზე ჩაფიქრებისათვის — არა სცალიანთ. მთელ დღე და

ლამეში ერთ წამს ვერ მოიკლიან ამისთვის.

დაუწყებ ლაპარაკს:

— სიმართლეზე უნდა ვფიქრობდეთ, და არა ანგაარებაზე, ყველას სიკეთეზე, და არა მარტო თავისაზე.

პასუხად გესმის:

— სადა გვაქვს ჩვენ თავი ამ ცხოვრებაში სიმართლეს გამოუდგეთ?

— კიდევ გამოდის უბედურობა: არა აქვს ჩვენში ადგილი ღვთის სიმართლეს. ვიწროთაა იგი. თავისი ცხოვრება ხალხმა მთლათ ბოროტი უსამართლობით გაავსო. და რა თავისუფლათ, მსუბუქათ და სიხარულით შეიძლებოდა ცხოვრება! აბა წარმოიდგინეთ, აქ, სწორეთ აი ამ ადგილზე, მე რა მქონდა? უდაბური ადგილი, ქვა, ქვიშა, ძეძენარი! ხოლო ეხლა რა არის? თითონ თქვენ ხედავთ. ეგვევა ცხოვრებაშიც. მომეტებულად გაანოყიერეთ იგი; შეავრცეთ მეტი სიკეთე.

— თქვენ, ახალგაზდებო, — მიჰმართავდა იგი ყმაწვილებს, რომლებიც მიდიოდნენ მასთან ყვავილებისთვის, — თქვენ თითონ ყვავილები ხართ. თქვენ კეთილი, სუფთა, ახალი სული გაქვთ, გაუფთხილდით მას, ნუ დააგლიჯავთ ფოთლებს, შეინახეთ მთელი სიცოცხლის განმავლობაში კეთილ-სუნუნელება ახალგაზდობისა. მანამ ყვავილი ახალია, — მას კარგი სუნი უდის; როდესაც დაქენა და დაღბა, მაშინ იგი სიმყრალეს უშვებს. გაუფთხილდით და შეინახეთ სულის სიახლე.

ამ საუბრების შემდეგ, ბევრს ყვავილებთან და ხილთან ერთად მიჰქონდა ბალიდან მარცვლები სიკეთისა, თესლი ახალი აზრების და გძრობებისა. ხალხი თანდათან უახლოვდებოდა ბრძენ მებაღეს და თანდათან იყვარებდა. ხალხი ხედავდა. რომ ფოკა ბევრს მუშაობს, და მომეტებულად სხვებისთვის, მინამ თავისთვის. რასაც მოიყვანდა თავისი მძიმე შრომით, ნახევარს აძლევდა სხვებს, დანარჩენს თუ გაჰყიდდა, იმასაც მომეტებულ ნაწილს აძლევდა ღარიბებს.

— შენ შენს თავზე იფიქრე! — ეუბნებოდნენ ფოკას ზოგიერთნი. — სულ სხვაზე და სხვაზე ზრუნე.

— მე ვფიქრობ ჩემ თავზე, როგორ კეთილად შევასრულო ჩემი საქმე, ჩემი სამსახური, — დამშვიდებით უპასუხებდა ფოკა. — როგორ შეიძლება არ ვიფიქრო ამაზე? ყველამ უნდა ვიფიქროთ. მე ჩემზე, შენ შენზე, მან თავის თავზე, როგორ უნდა ვიცხოვროთ. ცხოვრება, — ეს ხომ ღვთის ბაღია და ჩვენ ყველანი მასში მებაღეები ვართ. ჩვენი ბაღის გვერდზე დადის ხალხი, და აბა რასა სუნთქავს იქიდან? რას ხედავს ჩვენში? რით სარგებლობს?

— ჩვენ ამ საგანზე კი არ გელაპარაკებით! — ეუბნებოდნენ მოსაუბრენი. — ჩვენ ვამბობთ, როგორ იცხოვრებ, როცა დაბერდები, როდესაც აღარ შეგეძლება მუშაობა ბაღში? ვის მიადგები კარს მაშინ, თუ შენ თითონ არ გექნება რამე მოგროვებული სიბერისთვის?

— წავალ სხვასთან, უფრო ახალგაზდასთან, ვისაც შეძლება ექნება და ვინც თავის მამულს ისე უყურებს, როგორც ღვთის ბაღს.

— აი, მაგალითად, შენთან მოვალ! — მიმართა ფოკამ ერთ იქ მყოფ ყმაწვილს. — ნუ თუ შენ ერთ ლუკმა პურს დიშურებდი, თუ მე მშვიერი მოვიდოდი? ყმაწვილმა დაუფიქრებლათ უპასუხა:

— რა თქმა უნდა, არა.

— ჰო და, აი ხედავ? — განაგრძობდა ღმილით ფოკა. მაშ რატომ მომავალის გამო არ ვაკეთოთ აწმყო?

— უარი რომ გითხრან? — მკაცრად შენიშნა ვილატამ, — წარმოვიდგინოთ, რომ შენ ჩემთან მოხვედი, პურსა მხოვ, მე-კი გეუბნები შენ: „მომშორდი იქით, შენთვის მე პური არა მაქვს.“

— შეიძლება ესეც მოხდეს. ბაღში ყოველივე ხე ნაყოფს არ იძლევა. ზოგჯერ მიდიხარ ხესთან ვერ ჰპოულობ მაზე ნაყოფს, და ცარიელი ბრუნდები უკან. სამაგიეროთ არის სხვა ხეები ბაღში, რომლებიც მოგცემენ ნაყოფს. მით მომეტებულად უნდა ვიფიქროთ ღვთის ბაღზე. აქაც ყოველთვის მოიპოვებინა ადამიანები, რომლებიც მოგცემენ შენ ნაყოფს თავიანთი მოსიყვარულე სულისას.

ამნაირათ, მართალი ფოკას წყნარი, მოსი-

ყვარულე სიტყვები ადამიანის გულს ხვდებოდნენ. ხალხმა თანდათან გაიგო იმისგან ქრისტე მაცხოვრის სახარების სწავლა, ირწმუნეს სიტყვა—ღვთისა და მოინათლენ.

ადგილობრივ მოხელეებს ვერ ექაშნიკებოდათ ეს. ქრისტეს მოღვრება-ცხოვრების შესახებ ვერ ეთანხმებოდა მათ შეხედულობას, და ამიტომ იგი საშიშრათ მანებებელათა ციხეებოდათ იგი. შეატყობინეს იმ ქვეყნის უფროსს. მან ბძანება გასცა მოეკლათ ფოკა, როგორც გამავერცელებელი „მანვე“ ქრისტიანობრივი მოძღვრებისა.

სინოპის მოხელეებმა კარგათ იცოდნენ, რომ ფოკა დიდი პატივცემული იყო ყველა მეცნიერთაგან, ამიტომ ეშინოდათ. რომ არ შეეტყობინებიათ მისთვის ეს გადაწყვეტილება, და ან განგებ არ გაეპარებიათ იგი. ამიტომ იმათ ჩუმათ გაგზავნეს ფოკას უცნობი მხედრები, მის დასაჭერათ.

მხედრები გვიან საღამოთი გამოვიდნენ ქალაქიდან და გაემგზავრენ, რომ დამე მოესწროთ ფოკასთვის, ფოკა შემთხვევით თითონ შეხვდა იმათ მინდორში და ჰკითხა:

— საით მიდიხართ ასე გვიან, კეთილო ადამიანო!

— ფრინველის დასაჭერათ, — გაიცინეს მხედრებმა.

— ფრინველისა?... რომლისა? — გაკვირვებით ჰკითხა ფოკამ; — და რათა ხართ თქვენ ასე ბევრნი?

— ბევრნი? — უფრო კიდევ მოუმატეს სიცილის მხედრებმა. — ჩვენი ფრინველი განსაკუთრებითია; ერთი ვერ დაიჭერს

— სად გინდათ ის დაიჭიროთ?

— აქვე, ახლოს. დიდი გზის ახლოს ერთ ბაღში, ფოკა ჰკვიან. არ გაგიგონია შენ ის? ჩვენ გამოგზავნილები ვართ მის კისრის მოსაგრებათ. უნდა დავიჭიროდ და აქვე დავსაჯოთ.

ფოკა შეკრთა.

— ვიცი მე ფოკა. მხოლოდ რათ გინდათ მისი დაღუბვა?

— ძალიან მაღლა გალობს, — განაგრძობ-

დნ სიცილს ბრიყვი მხედრები. — ძილს უფრო ხობს... აბა წაგვიყვანე იმასთან, თუ იცი ის.

— წავიდეთ, — უთხრა ფოკამ, — და წაიყვანა სალდათები მინდვრებზე თავის ბაღისკენ. მიიყვანა უკანა კარებთან, გააღო კარი და შეუშვა მოულოდნელი სტუმრები.

— დრო დაგვიანებულა, ჩემო მეგობრებო, — უთხრა იმან იმათ. — თვენ შეიძლება დაილაღენით, მოგშივდათ. ხომ არა გნებავთ მიირთვათ რამე, რაც ღმერთმა მოგვცა. ფოკასთვის ნუ შეწუხდებით. თავდები ვარ, ის ვერ წაგივით. თქვენ იმას წაიყვანთ, როცა კი გინდათ.

სალდათებს გაუხარდათ მიპატივება, დასხდნენ ბაღში, ხოლო სასიკვდილოთ განმზადებულმა ფოკამ საჩქაროთ გაუშალა ვახშამი თავის მტარვალებს. მიუტანა მათ თაფლი, თეთრი პური, მწვანელი და ხილი.

როდესაც მხედრები დანაყრდნენ, ფოკამ სთხოვა მათ:

— დამე აქ დარჩით ჩემთან; დილაზე მე მოგიყვანთ ფოკას; ეხლა კი თქვენც დაისვენეთ, და მეც რამდენიმე საათი მომეცით მოსვენება. დაიჯერეთ ფოკა თქვენი იქნება დილაზე აღრე. გათენებამდის უკვე ბევრი დრო აღარ არის დარჩენილი.

მხედრები დათანხმდნენ. ფოკამ გაუშართა მათ სუნენლოვანი ბალახიდან რბილი ლოგინი, და ისინიც ღრმა ძილს მიეცნენ. ამასობაში პართალი ფოკა წავიდა თავის ბაღში, გაფურჩქნილ ვარდის ბუჩქის ძირში გასთხარა საფლავი, და დაიწყო ლოცვა:

— უფალო, ღმერთო ჩემო! შენ გამოგზავნე ჩემს გულში მარცვლები შენის სიმართლისა, და უხვად აღმოაცენე იგინი! ეხლა შენ ჰგზავნი ცელს ასაღებად ცხოვრების მინდვრიდან მწიფე თავთავისა და შესატანედ შენს ბელელში. იყვეს შენი ნება, და იყვეს კურთხეულ სახელი შენი მთელ ქვეყანაზე ამიერიდან და უკუნისამდე! ქება-დიდება შენ! მიიღე შენ საკურთხეველზე ჩემი მდაბალი ლოცვა, ხოლო სული ჩემი — შენს ზეციურ ბაღში. შენ გამოგზავნე მე ქვეყანაზე, ეხლა მიწოდებ შენთან. მოვდივარ უფალო, მოვდივარ!..

ირაყრატა კიდეც. აღმოსავლეთის ცა წითლად დაიფარა.

— ღგება დილა, ახალი დღე, ჩემთვის კი ახალი ცხოვრება. — ჰფიქრობდა მართალი ფოა. — ადგა ლოკვიდან და წავიდა თავის მტარკვალების გასაღვიძებლად.

— ადექით!.. დროა!.. მე თქვენ მოგიყვანეთ ფოკა.

— ფოკა? — წამოხტენ სალდათები. — სად არის ის?

— აქ. თქვენ წინ.

— აქ, სად? — იფშენტავდენ თვალებს ახლად-გაღვიძებული სალდათები. — აქ მხოლოდ ჩვენა ვართ და შენ.

— აი სწორეთ მე ვარ ფოკა, რომელსაც თქვენ ეძებთ.

— შენ ხუმრობ! უგუნური ხუმრობაა! — ჯავრდებოდენ სალდათები. — ტყუილად გაგვაღვიძე, ტბილი ძილი გაგვაწყვეტინე.

— მე მართლა ვამბობ. ამის მოწამე საფლაფია, რომელიც მე ამოვთხარე, მანამ თქვენ გეძინათ.

სალდათები გაშტერდენ. წავიდენ ბაღში, ნახეს, — მართალია, ახალი საფლაფი დახედათ. უყურებენ ერთმანეთს, უყურებენ ფოკას და ვერ გამოაკვეთილყვენ. შეკრთომილები ეუბნებოდენ:

— იცოდი, რომ ჩვენ მოვედით შენ მოსაკლავად: შენ კი მიგვიღე ჩვენ, როგორც მეგობრები, როგორც ძმები! თავისუფალი იყავი მთელი ღამე, და კი არ გაიქეცი! რა კაცი ხარ შენ? რამ დაგიჭირა?

— მე ქრისტიანი ვარ; მე დამიჭირა იმან, რაც ჯაქვზე მაგარია, — სინიდისმა.

სალდათებს ვერ გადაეწყვიტათ ფოკას მოკლა. მათ უფროსს უნდოდა წაეყვანა იგი ქალაქში.

— ღაე იყვეს, რაც იქნება, — ამბობდა ის, — ჩვენ კი არ შეგვიძლიან შენი დასჯა! იმის შემდეგ, რაც ჩვენ ვნახეთ აქ შენთან, ხელი აღარ გვემოძიოლება.

— ნუ წამიყვანთ ქალაქში, — სთხოვდა მართალი ფოკა. აქ, ბაღში უფაღმა მომცა მე სი-

ხარული შრომისა დასამშვენებლათ ღვთის ბაღისა ხალხის გულში; აქვე მინდოდა მე ჩამეყარა ჩემი ძვლები. შეასრულეთ თქვენი საქმე, და დამტოვეთ მე ჩემს ბაღში ახალ გაღვიძებამდის. ვთხოვთ მომცეთ ეს ნუგეში.

მხედრებმა შეასრულეს თხოვნა მოწამისა. საფლაფის ნაპირზე მოსკრეს მას თავი და მოწიწებით ჩაფლეს მისი გვამი საფლაფში.

ამნაირათ, ღვთის მებაღემ, ფოკამ მრრწყყო ბოლოს ქრისტეს გულისთვის, მოწამებრივი სისხლით ის მიწა, რომელსაც ის წინა წლებში, ქრისტეს იმავე სიყვარულის გულისთვის, რწყავდა თავისი შრომის ოფლით ხალხის სასიხარულოთ და ცხოვრების დასამშვენებლათ.

მღვ. იოანე ლუკიანოვი.

კვირიღამ-კვირამღე.

გადაიწვა აღისუბნის მფორეკლასიანი სკოლის შენობა თავის ავეჯეულობით. ზარალი დილია. მიზეზი გამოურკვეველი დარჩა.

ჩამოვიდა სინოდის მიერ გამოგზავნილი სასულიერო სასწავლებლების რევიზორი.

ყოვლადსამღვდელო გიორგის უთხოვნია სემინარიის რექტორისთვის, რომლის ხელშიაც არის იმერეთის სამღვდელოების სამარხი კასის წესდება, დააჩქაროს მისი განხილვა და დანიშნულებისამებრ გადაცემა.

ქალაქ მოსკოვში ამ ჟამად სტარობრიადლების კრებაა. ამ კრებას ცნობა მოსვლია, რომ დასავლეთ მხარეების სტარობრიადლებს გადაუწყვეტიათ შექმნან მთელი რუსეთის სტარობრიადლების ორგანიზაცია, რომელიც მომავალ არჩევნებზე ხელმძღვანელობას გაუწევს მათ და ეცდება თავის კანდიდატი გაიყვანოს სახელმწიფო სათათბიროში.

ამასწინათ სტაროობრიადცების სხვადასხვა ორგანიზაციებმა თხოვნით მიმართეს სინოდს, რომ ნება დაერთო პროტოპოპ ამბაკუმის (ერთი უმთავრესი მოთავეთაგანი იყო) საფლავზე ჯვარის დადგმაზე, მაგრამ სინოდმა უარი უთხრა. ეხლა მოსკოვის კრებამ წინადადება მისცა ამ ორგანიზაციებს მიმართონ შინ. საქ. მინისტრს და არა სინოდს, რომელსაც არავითარი დამოკიდებულება არ აქვს სტაროობრიადცებთან.

მოსკოვში ხმა გავრცელდა, რომ წრეულს საშუალო სასწავლებლებში ეგზამენები 12 და უმაღლესში 1 მაისისთვის უნდა დასრულდესო.

ანტონ ვოლინელი შესაძლებელად სცნობს ახლავე დაინიშნოს რუსეთის პატრიარქი მეფის ბრძანებით. უპატრიარქოთ არც ადგილობრივი კრება შესდგება მისი აზრით, რადგან კრების მომწვევი და ხელმძღვანელი პატრიარქია. პატრიარხობა რუსეთში არ მოსპობილა, მხოლოდ დროებით დარჩა შეკრული პეტრე დიდის რეგლამენტის ძალითო, ამბობს იგი. თუ პეტრეს უფლება ჰქონდა ასეთი არა ღვთისსასიამოვნო საქციელი ჩაედინა ეკლესიის მიმართ, ვინ დაუშლის და რამდენათ ღვთის სასიამოვნო საქმე იქნება ამ საქციელის გასწორება ხელმწიფისაგან, რომელსაც შეუძლია დღესვე დაასახელოს პატრიარქად ან პეტერბურგის და ან მოსკოვის მიტროპოლიტი. ამის შემდეგ ქრისტიანული ძმათმოყვარეობა აფიქრებებს სახელმწიფოს თავს და ეკლესიის თავს, გამოითხოვონ ამის შესახებ აღმოსავლეთ პატრიარქების ლოცვა-კურთხევა.

(Y. P. № 34)

სახელმწიფო სათათბიროში შეტანილ იქმნა კანონპროექტი შესახებ სამხედრო გადასახადისა. ამ კანონპროექტის ძალით ექვს-ექვსი მანეთი გადახდება 4 წლის განმავლობაში ყველას, ვინც სამსახურით ან რომელიმე სხვა მიზეზის გამო განთავისუფლდა სამხედრო სამსახურისაგან. ამ გადასახადიდან მოკლიან 13 მი-

ლიონ მანეთიან შემოსავალს, რომელიც სამსახურ შესრულებულ სალდათების საპენსიო თანხაში შეირიცხება.

სამმა მანდილოსანმა, რომლებიც ილიოდორეს სული წმიდის სავანეში ცხოვრობდნენ და რომლებიც ეტაფით გაგზავნეს თავთავის ქმრებთან, უჩივლეს სარატოვის კონსისტორიას 16 ათასი მანეთი, რომელიც ილიოდორეს აუღია მათგან მონასტერში ცხოვრების უფლებისათვის. ეს ფული მონასტერში არ აღმოჩენილა.

როგორც სარწმუნო წყაროებიდან გავიგეთ, მისმა მეუფებამ ეპისკ. დავითმა სამასი მანეთი შესწირა სოფ. პატარა ჯიხაიშის სამრევლო ეკლესიის გასამშვენებლათ.

შინაური საქმეების რედაქციამ ნებართვა გამოითხოვა მისი მეუფების ყოვლადსამღედელო გიორგისაგან შესახებ გამოკრებილი კურთხევანის დაბეჭდვისა კერძო პირებზე გასაყიდლათ. მისმა მეუფებამ თავის მხრით ნება დართო და შუამდგომლობა აღძრა სინოდის კონტორის წინაშე. განძრახულია თითოეული მღვდელმოქმედების წესი ცალკე წიგნაკათ გამოიცეს. თუ კონტორამ ნება არ დართო, რედაქცია მხედრული ასოებით შეუდგება ამ წიგნაკების ბეჭდვას.

რედაქციამ მიიღო ახალი საეკლესიო წიგნები სლოვენურ ენაზე. ეს წიგნები შეიცავს მთელ ღვთის მსახურებას დიდმარხვის პირველ კვირიაკისა და ვნების კვირისას. წიგნები ისეა შედგენილი, რომ თითოეული დღის მსახურება სავსებით არის მოყვანილი, ასე რომ ამ წიგნებთან საჭირო აღარ არის არც ეამნ-დავითნი და არც მარხვანი. რამდენათ საჭიროა ჩვენი სამღვდელთებისთვის ასეთი წიგნები დღეს, როცა ტიპიკონის კოდნა ასე დაუცა, ამაზე ბევრი ლაპარაკი საჭირო არ არის. რედაქცია ფიქ-

როსბს ეს წიგნები ქართულად გამოსცეს. საქი-
როა ვიკოდეთ, როგორ შეეგებება სამღვდელო-
ება ამ გამოცემას.

გამოვიდა ახალი წიგნაკები „შინაური საქ-
მეების“ გამოცემა: „პროფესორ მაქს მიულერ-
ის აზრი მატერიალიზმზე“ ფასი ორი შაური
და ნინობა და მისი მნიშვნელობა“ ფასი ერ-
თი შაური. აგრეთვე მზადდება და მალე გამო-
ვა ბატ. ჯაფარიძის წიგნაკი „ბუნება და ადა-
მიანი“.

ძმობის სტამბაში იბეჭდება და მალე გამო-
ვა „ექსპერიმენტალური პედაგოგია“ — თხზუ-
ლება დ. უზნაძისა. წიგნი თანამედროვე პედა-
გოგიის უკანასკნელი სიტყვაა და კარგი ქარ-
თული ენით არის დაწერილი. იგი აუცილებე-
ლი სამაგიდე წიგნია ყველა მასწავლებლებისა-
თვის. წიგნის დაკვეთა ეხლავე შეიძლება „შინ-
აური საქმეების“ რედაქციაში-

უწ. სინოდს ნება დაურთავს გაიყიდოს
ქუთაისის საკრებულო ტაძრის კუთვნილი ად-
გილები ქ. ქუთაისში მოიჯარადრებზე უვა-
ქროთ, როგორც შეფასებულია, სულ 18136
მ. და 5 კ.

ბ. ფილიპე მგალობლიშვილი საჩხერის ეკ-
ლესიის აშენებაზე მიღებულ შრომისათვის დაუ-
ჯილდოებიათ მეორე ხარისხის სტანისლავის
ორდენით.

ამ წლის სამღვდლოების ჯამაგირების
კრედიტი ჯერ კიდევ არ გაუხსნიათ. ეს იმის
ბრალია, რომ სამღვდლოების ჯამაგირს ათას-
ნაირი სხვადასხვა გადასახადები ადევს და კან-
ცელარიაში ანგარიშები ძნელდება. ურიგო არ
იქნებაო, ამბობენ, ჯამაგირებს გაათავისუფლებ-
დენ და გადასახადებს ბლადოჩინების საშუალებ-
ებით აიღებდნო. ან რა გამოსარიცხავია ჯამა-
გირებიდან გაზეთის ფული, რომელიც ეკლე-
სიის ფულით იწერებაო. კარგი იქნება ამის
შესახებ სამღვდლოება ხმას ამოიღებდეს და

რამე ერთ გარკვეულ გზას დაადგებოდეს.

როგორც ვაზ. კოლხიდა აღმოგვეცემს,
მღ. მ. კელენჯერიძეს მადლობას სწირავს პე-
ტერბურგის ფსიხო-ნერვოლოგიური ინსტ. ქართ.
ტულ. სამეცნიერო წრე და წიგნთსაცავ-სამკი-
თხველოს გამგეობა თავის ნაწარმოების შეწირ-
ვისათვის.

როგორც „სახალხო გაზეთი“ გვატყობინებს,
23 თებერვალს, ტფილისის სასულიერო სემინა-
რიაში მოსწავლეებმა არეულობა მოახდინეს.
ამ ამბავს პოლიციის ცნობა ამნაირად აღმო-
გვეცემს: „დილით 23 თებერვალს, ტფილისის
მართლ-მადიდებელთა სასულიერო სემინარიის
პირველ, მეორე და მესამე კლასის მოსწავლე-
ნი (რუსებისა და ბერძნების გარდა) სემინარიის
ტალანში (კორიდორი) მოგროვდნენ და კლა-
სებში გაკვეთილებზე შესვლა არ მოისურვეს.
რექტორისა და სემინარიის ინსპექციის თხოვნა-
დარიგებამ არ გასკრა: მოსწავლეებმა ხმაურო-
ბა ასტეხეს და სხვა და სხვა მოთხოვნილებების
წარდგენას აპირებდნენ. რადგანაც მოსწავლე-
ნი სემინარიის მთავრობას არ დაემორჩილნენ,
სემინარიის შენობაში მოწვეულ იქმნა პოლი-
ციელთა რაზმი. მივიდა პოლიცემისტერი პოლ-
კოვნიკი ზასიპკინიც, რომელმაც მოსწავლეებს
გადაქრით გამოუცხადა, არავითარ მოლაპარა-
კებას არ გავმართავ თქვენთანაო. ამასთანავე
გადაქრითვე მოსთხოვა, დაშლილიყვნენ და კლა-
სებში შესულიყვნენ. მოსწავლენი ამ მოთხო-
ვნას დაემორჩილნენ. ამის შემდეგ პოლიცემის-
ტერმა ყველა განყოფილება სათითაოდ მოიარა
და მოსწავლეებს წინადადება მისცა, განკალ-
კეებულებიყვნენ ისინი, ვისაც სწავლა არ უნ-
დოდა. გამოირკვა, რომ სწავლა ყველასა სურ-
და. სამსავე კლასში სწავლა დაიწყო და წესი-
ერება აღარ დარღვეულა. პოლიციამ შეიპყრო
15 მოსწავლე. მათ ბრალდებათ არეულობაში
მხურვალე მონაწილეობის მიღება.

რედაქტორი, მღვდელი **ს. მამედლიძე**.
გამომცემელი **იოსებ ლეჟავა**.

ქ. ქუთაისი, სტამბა „ძმობისა“. კახაკოვის შესახვევში, სახლი № 17.